

Téerëe débpí bíníyú unna won Pool Timoote ra Kúnsëe

Pool bíníyë'té Timoote waal ana. Yee daa unna déf dí ríi bíní rë. Na bíní rí Pool unni yee ra deef dí fi Timoote ín Efes. Tii Timoote nék caakutee capu filiḅ Téerëe bíníyúu tìlédí apootarra ra a unna bíní Pool ra.

Di fi Timoote, yaafa húmú yëwúdí haalte ngémë, boffa húmú gerek. Pool na yëedíḁ dí, haba'te ri koy kah-kah díi na, bani Pool na ñéerúu waarii Uni Neba (Saame Tìlédí apootarra 16.1-3).

Tígí húmú kelaa Pool gini fí yúhté bití ngémí ðëy ílí jan̄aa hompe ëylëh ðéëḅ, mbée tígí dí húmú faha' yúh yee homuu ðëy ílí jan̄ii baaha ra, dí hoñci wola' Timoote. Di húmú wolte ri ðëy Tesalonik na (Saame 1 Tesalonik 3.2-3) ; wolte ri ðëy Korente na (Saame 1 Korente 4.17) ; wolte ri ðëy Efes na.

Wola' ri ri ðëy Efes na ra, dí húmú nah ri habra'i wa nda wa ham ngémí wë híin, ndah húmú laha' ðëewí nē yëedḁúu iñi bokaay a ngémë, na múuyḁú wë (1.3-7).

Unna déḅ yee ra, Pool líkinté dí fi Timoote a faanañ fí, wonte ri iña waḁ díi líkín ðëy ílí jan̄i ya ra ḁal.

Di wonte wa :

- yii len̄ke di waḁ waa fahantuun hanndal ki wa (1.5),

- yii lenke likíní Timooto bëy ílí jaŋaa (1.18-19 ; 4.7, 11-16),
- yii lenke di wadti tilée jaŋaa (2.1-15 ; 5.1 nū 6.2 ; 6.17-19),
- a yii lenke di wadti madun njíittí jaŋi ya (3.1-7).

Bëyí fí jaŋi téeríi bee bëeb ay yúh dee wadti tilée jaŋaa ra te ri ay mín moytoh bëewí nē múuydú bëewē a yēeddē' yí wē rē.

Wodohi Pool Timooto

¹⁻² Do fi Timooto, dō fa haba' mi koy kah-kah filiḅ ngémē rē, so' mi Pool, so' mi apootari Yéesú-Kiristaa daa mi na wodoh ro. Koope Sēmlēhí yen a Yéesú-Kiristaa yaakaari yen daa falu so' apootar. Baap-Koo a Yéesú-Kiristaa Yíkíi yen líhún dē mal, teeḅ dō naa'-keēñ, on dō jaamma !

Yēeddēh yí paḍḍah ya

³ Na húmú saañ mi Maseduwaan ra, mi húmú nahte ro fu tas Efes, fu won bëewē nē yēeddúu iña na múuyíḍ bëewí kayya ra bití wa ḅan díi paŋ. Dí húmú naha' mi ro ri, mi naha' ro ri ḍaaha woteh,

⁴ fu kadda' wa wonna waa na saku sako ra a cabi tii yi caacca mínéh dūmmē homuu wa ra. Wonni yaa kúrē' capa' kep, na ḅaateh dara yee faha' paŋ Koope ra. Yee faha' paŋ Koope baa ra nék, ngém kep nay tahe ow yúh rí.

⁵ Fu ot mi nah ro kadda'i bëewē nē yēeddúu iñyaa ra, nda bëy ílí jaŋaa fahanta' hanndal ki wa a keēñi lante, nufi lante a ngémí mitte.

⁶ Lahte bēewí helute waali baa múuyuté, haalute wonni lahay njiriñ.

⁷ Wa habuu affi wa bēewí yēeddúu Kootaa, wa anti yíih dara iña na wonu wa ra a yee na digiru wa ra.

Yee tah Kootaa koloh ra

⁸ Nagajek, yen yúhuté biti Kootaa yii wunte, hém dī pesuu ti di wad dīi pesuun nen.

⁹ Yen yúhún biti Kootaa saamdúy bēewé júbú rē. Kootaa saamdú bēewé nē ñéyíh woni Koope ra, yee faaliyuuy ri ra, yee kaañu Koope ra, bakaaroh ya, yee onuy Koope cér onuy yii kola' Koope na cér rē a yee na bēemú yaayyi wa mbée baappi wa mbée bēewí kayya ra.

¹⁰ Kootaa saamdú bēewé na pagu yii tappe njaaliyoh béeβ rē bal, gēer-jígéennē, bēewé na habu bēewé yaaye wa wa hen ñaam ra, feloh ya a yee na añuu di yii henay kaah ra. Maanam, Kootaa saamdú bēewé na pagu yii haayaay a iña yēeddú rēn te daa kaaf ka ra.

¹¹ Iña wonu yaa ra ee filiβ Uni Neba teeβa' dēe líifē' Koope a ndam ra. Di fi Koope fa baah teem dīi na ra déngéenté sē' Uni Nebi bah.

Símí Pool Yéesú-Kiristaa

¹² Kon, ma na sím Yéesú-Kiristaa Yíkíi yen, dī fa lekoh so' yedte so' légéyí beh, antee tík onte so' doolaa wad na ra.

¹³ Te añcañ, filoon mi húmú wona' βos sun fi, mi sole bēewé gémú dīi na ra, mi mokle wa. Ndaa dī yérémpé sē' ndah mi húmú gémēy dīi na, mi yéeh yee na húmú pañ mi ra.

¹⁴ Yéésú Yíkíi yen onte so' mali mínéh dúm : mi gémpé díi na, mi faha'te moroomi so' faha'i kola' dí fi Yéésú-Kiristaa na.

¹⁵ Woni wéerté te mit lekoh abeh : Yéésú-Kiristaa ac ëldúnë sëmlë'í bakaaroh ya. So' mi beh, daa mi bakaaroha lukki gaan da,

¹⁶ ndaa Koope yérémpé së', nda Yéésú-Kiristaa ñeya' so' fa lukki gaan bakaaroh ya bee ra, teeɓa' míní múñí. Hen daaha raa, bëewë gémú díi na nay haale pesa na dúméh rë yeel yee kat so' raa, wa ɓaatti ham ngémí wë.

¹⁷ Di fi Koope fa daa Buur faraa ra,
dí fa na pes faraa ra,
dí fa ow mësëy ríi tík íl rë,
dí fa yínë kut da,
daa ri mit béyíd,
daa ri yeeliyoh ndam
dee níi kiri fi kirih ! Démíin !

¹⁸ Leegi dō fi Timooté koy so', yee líkín mi ro baa ra, deefidte iña húmú wonu bëewë në léhínú unni kola' Koope na sun fu bín fë rë. Iñyaaha hena ganaay dōo na wa bedda' ro légéyí wuna nah mi ro ra,

¹⁹ fu paŋ dí a ngém a nufi lante. Lahte bëewí kaa'uute paŋ nufi wuna hom waa na ra níi tahte ngémí wë saatate.

²⁰ Himene a Iliksaan nonu bëewí yaaha. Mi tíkké wë ya' Seytaane nda wa koroh, wa ɓanti solil Koope.

2

Líkíní Pool Timooté yii leŋke daŋ

¹ Kon Timothee, yee nay mii débée naha' ra daa ri biti don dagid' bëewë bëeb Koope, don wonid' wa ri sohle yi wa, don dagid' wa di dímlë' wë, don símí' wë rí.

² Lah d'égírí buurra a bëewë homu af nguur ka ra bëeb nda yen pesa' jaamma a afi tookke, yen pesa' pokoh Koope na, yen tíl tilëd' ow.

³ Baa daa yee wun te neba' Koope fa daa Sëmlëhí yen da.

⁴ Di faha' biti bëewë bëeb múc, yúh kaaf ka.

⁵ Koope, di yínë kut. Ti daaha nen, bëe' hom hanndal ki Koope a bëewë rë, di yínë kut. Di ow, te daa ri Yéesú-Kiristaa

⁶ fa yera' ñíní tosse pesi bëewë bëeb rë. Daaha, laha' wahtaa ra, di teebe'te faha'a faha' Koope biti bëewë bëeb múc dë.

⁷ Yii baa daa tah mi falu apootar, mi wolu waare mi yeedid' bëewë yëwúd' neh ra yii lenke ngémë a yii lenke kaaf ka. Yee won mi ron baa ra fel neh dé', mi won don kaah.

Di wadti man ow yaal a di wadti man ow beleb

⁸ Kon, mi faha' biti yaalla a tígí mín wëe hom bëeb kaye ya' yi wa dage Koope. Wa paguun di a keeñi lante, banti ñéerë' a haay-keeñ a íñë'.

⁹ Ti daaha nen bal, mi faha'te biti belebba bekuun bekohi lilte te jekke, banti bekoh bekohi wa ay teebee affi wa. Wa banuy mokil affi wa múukëh garan a seemoh úrís mbée feme mbée bekoh búubbi yaañjate saame neb yeel.

¹⁰ Nebi yeeli wa kay, lah oluun iñi wunna nay waa page ra. Iñi wunni yaa daa wad' belii won biti onte Koope cér.

¹¹ Bee yaal hompe yëeddë' yii lenke Koope ra, lah belebba henun ñol, kúnís nuffi wa síkírëh.

¹² Mi onay beleb yëedídf yaal, mi onay ri ílíf rí. Di hena ñol !

¹³ Nagajek, yaal daa d'ébpi saku, beleb na an naa tíkëh.

¹⁴ Te sah, Seytaane nafaay bëyi yaala, nafa' bëyi belaa, di nafaay Aadama, nafa' Aawa. Kon, bëyi belaa daa nofuu, di bakaadte.

¹⁵ Ndaa, laha na lah beleb koy ra, ay tah di múc hém di ham ngémë híin, di fahee moroommi faraah, di hen bëyi lante fii Koope, banti teebee afi.

3

Di wadti man njiit jani

¹ Woni wëerté abeh : bëyi faha' hen njiit jani, deef di faha' légéyi wunte.

² Njiit jani nék wadti hena bëyi lahay dara yii wonun sun fi, teem belebi na kut, di hen bëyi teeyte, mín ham afi, di hen bëyi yéńké ow. Di wadti hena bëyi mínté haneel, mínté yëeddë',

³ di banti hen bëyi haa' a han kep daa afi. Di wadti hena bëyi sosse te na íñéeh, di banti hen bëyi gémpé hélíis.

⁴ Di wadti hena bëyi kúdté faami kúrí ñeete waal, di kod koyyi ní wa yed di cérí mitte sèk.

⁵ Bëyi mínéh kúdf faami kúrí ñeete waal, bëyi baa ay mínée kúdf bëewí Koope díh ?

⁶ Njiit jani waray hen bëyi anti haal ngémë, toñeh di paama gaan-gaanloha ní Koope daan ri ti di daana' ri Seytaane nen.

⁷ Di wadti hena bal, bëyí yénké biti bëewë nënính yen na ra wonuu wun sun fi, toñeh dī keen fiirí Seytaane, wa haba' ri ow bos.

Di wadti man bëyí në habra' njüt janj

⁸ Ti dāaha nen, bëewë na habruu njüttí jaŋaa ra wadti henun bëewí mitu yed cér te wonuu kaah. Wa waruy hen bëewí han kep daa affi wa a bëewí paguu yii waray, saame na alal.

⁹ Wa warun ham kaaf ka hom ngémë teeḅ yen Koope ra a nufi lante.

¹⁰ Wa warun olsuu olsoo paay níi lan biti lahay yii wonun sun fi wa, wa anti mín hen bëewí nay habree njüttí jaŋaa.

¹¹ Ti dāaha nen bal, beleḅḅa warun hen bëewí mitu yed cér, në wénính bos sun ow, teeyute, mitute lekoh iña bééḅ.

¹² Wa fi bëewë na habruu njüttí jaŋaa ra, ow fi ow waa na bééḅ wadti teya beleḅi na kut, wa kúḁ faammi wa kúrí ñeete waal, koḁ koyyi wa kori wunte.

¹³ Wa fi bëewí yaaha légéyí wë wun dāa, wa ay kañu. Wa ay waariyee a fidí mitte sək di yii lenke ngémí wë Yéésú-Kiristaa na.

Yii gaana teeḅ yen Koope ra

¹⁴⁻¹⁵ So' nék, mi yaakaarte bitih, leegi mi ac yérú ndaa mín hen ayi so' gaaweh. Baa daa tah mi bíní rë unni yeh. Hen dāa raa, fu yúh dee wadti pesaa ow filiḅ Faam Koope ra. Faam fi baaha, daa bëy ílí janji Koope fa na pes dā. Daa ri cíḅè ham kaaf ka ra.

¹⁶ Woni ow mínéh ríi nís abeh : Kaaf ka teeḅ yen Koope nda yen pokoh dīi na ra gaante !

Kiristaa acce hente ow,
Ruuh-Pesen teeḅa'te bití dī júbépé,
malaaka ya tíkúté nē íllí wē ngēey.
Dí waariyute heetta,
lahte ḅēewí gémúté dīi na ēldúnē ḅééḅ.
Dí kēllúté feey fa,
saañce sun-Koo a ndam.

4

Iña sak Koope ra ḅééḅ wun

¹ Ruuh-Pesen wonte yīi lante abeh : jamanaa
nay mǐllée balaa nimili Yéésú rē, ay lah ḅēewí
súugēh ngémē, wa ñee iñi ḅossa nay waa
yēeddú te kola' dakki Seytaane nay waa múuydé
rē.

² Ḃēewí wonni wa teem búkkí wē te lahuy jom
ay waa múuyíd a fel misik.

³ Ḃēewí yaa ay kadda' ḅēewē kooranta', kadda'
wa ñami ñamma aa na. Añcañ, Koope daa sak
iñyaaha ḅééḅ nda ḅēewē gémú te yúhúté kaaf
ka ra, mín nēe njiriñoh, wa sím rí.

⁴ Nagajek, iña sak Koope ra ḅééḅ wunte, lahay
yīi ay naa tíibúu. Yee lah solo ra daa ri bití ḅēyí
fi njiriñoh na rek, lah símē Koope

⁵ ndah unni Koope a ḅaṇa nay ron ḅage ra daa
nay tahe wa lan íllí Koope.

Dí wadti man sǔrgíi Yéésú-Kiristaa

⁶ Do nék, fu dékē' teeḅi koy-yaayya filiḅ ngémē
iñyaa raa, ḅēef fu légéyídté Yéésú-Kiristaa
légéyí wunte. Baa daa nay teeḅee bití iña won
Koope a yee yēeddú fu rē pesilte ro, fu ñeete na
te wa kaah.

⁷ Ngana síkírèh wonni saku sako, wa wonni lahay af a lúk, yi len iñi èldúnè kep. Do kay, meedde afu pokoh Koope na.

⁸ Meeril faan hégíyèh lahte njiriñ naam, ndaa njiriñ ma laha' tígí teem ri. Pokoh Koope na nék, njiriñ mi mínéh dúm ndah dī èmbè iña gapa' Koope pesi feey fi bee a pesa na ac fíi rē.

⁹ Woni wèerté te mit lekoh abah !

¹⁰ Yii baa daa tah yen na hawu affi yen, yen na légéyú ndah yen tíkú yaakaari yen Koope fa na pes ra na, dī fa daa Sëmléhí bëewë bééë, níi luka' bëewë gémú rē.

¹¹ Lah yëeddé bëewë iñyah, fu túuy wë pañi wa.

¹² Ow banay roo heef ndah kiillè laha' fu ra. Do nék, lah page yii nay tahe bëewë gémú rē yeele doo na, wa ñee kottu di wonaddu, pagaddu, dee faha' fu ow ra, dee gémè' fu a dee lada' fu ra.

¹³ Lah mokle afu janjiyiri bëewë iña bíníyú Kootaa ra, fu on wa doole, fu yëedid' wë níi èyín kí sè'.

¹⁴ Ngana sargana' yee on do Koope, ñéyid' rí bëewë nè léhínú unni kola' Koope na, bee tíkúu rē njíttí jaŋaa ya' dagirute ro ra.

¹⁵ Beke iñyaa afu, fu pokoh na, bëewë bééë yúh biti fee saañ fíi rē.

¹⁶ Lah yúhé afu, fu yúh yee na yëeddè' fú rē, fu ham na híin. Hen daa raa, fay múcël afu, fu múcël bëewë nè síkírúu rē rē bééë.

5

Dee wadti kúruun bëy ílí jaŋaa ra

¹ Fu yahti won a baha, ngana dfaañjoh afa. Lah gonle a ri ndan̄ka ti baap nen d̄oo na. Ti dfaaha nen bal, lah líkínée tun̄ki yaalla ti koy-yaay nen d̄oo na,

² fu gonla' a bitiffa ndan̄ka ti yaay nen d̄oo na. Lah líkínée bal tun̄ki cafaaya ti koy-yaay nen d̄oo na, ñéerë' a nufi lante.

³ Lah tooppitee beleb̄ba yaalli wa húl te lahay bëyí habraa wa ra.

⁴ Ndaa nék, lah bi lahte i koy mbée i sét d̄ee, wa fi yaa d̄ébúun yúh bití wa warutee tooppitoh yaayyi wa mbée caacci wa, yíníl wë ina pagiru wa wa ra, teeḃa'i bití wa pokuute Koope na. Baa daa yee faha' Koope ra.

⁵ Belii yaala húl, hen njundun̄ lahay bëyí habraa ri hom tíkë' yaakaari Koope na, d̄age na' a elek wone sohle yi.

⁶ Ndaa belii yaala húl, anti tík púukërë kep afi, homa' ri pes níi, d̄i húlté illí Koope.

⁷ Lah líkíné beleb̄ba yaalli húlú rë unni yah nda wa pes pesi laheh dara yii wonun.

⁸ Bëyí fi tooppitaay mboko yi, níi luka' yee sésú d̄ii na rík rë nék, d̄eef d̄i súugëhté ngémë te ri luk bëewë gémúy rë bos.

⁹ Belaa waḁti bíníyú filiḃ téerëe në bíníyúu beleb̄ba yaalli wa húl, nay tooppituu ra, waḁtee lah wuti yin-yin kíil sabay pëenë (60). Di waḁti hena belii húmú teya' yaali na kep,

¹⁰ yúhúu a pagad̄d̄i wunni yeh : kodte koyyi kori ñeete waal, húmú mínté haneel, na húmú tooppitoh bëewí Koope, na húmú dímlë' súfúñíddë, na húmú paṇ yii wuni mín d̄ii hen

béef daal.

¹¹ Jéegí teŕ-teba yaalli wa húlú rë nék, banuy bíníyú ndah nuffi wa mín tas yaal wa súugëh Kiristaa, wa faha' kooroh a yaal kay.

¹² Tígí daaha, wa ay daanu ndah wa pokuuy yee húmú gapuu wa ra.

¹³ Te baatte biti wa bíníyú rëe, wa ii lahil pagad. Hen daa raa nék, wa haale faam ëe faam, pëgíh në dara gét nëe pereem misik, won yii waal fi wa íníh në a won woni lahay af a lúk béef.

¹⁴ Yii baa daa tah mi faha' biti wa fi jéegí teŕ-teba yaalli wa húlú rë saam yaal kay wa kooroh, wa lah i koy, wa kúŕ faammi wa níi ñee waal. Hen daa raa, wa lëhíh dara yii tah kaa'oh yi yen sol yen,

¹⁵ ndah lahte na yi fí yúhté biti helute waali wa, ñéeruté a Seytaane.

¹⁶ Belii gémpé lah mboko yi yaalli wa húlúté rëe, lah tooppitaa wa ban waa yedda' a jaŕaa. Hen daa raa, jaŕaa ay mín tooppitoh yee henu njundun lahay bëyí habraa wa ra.

¹⁷ Njittí jaŕaa na légéyú légéyí wunte ra mitu on cér níi mit sèk, níi luka' yee hawu affi wa waare a yeeddë' rë.

¹⁸ Bíníyúté Téerëe nagajek bitih : « *Mbaam* fi hom légéy meey ngana pok búgë fu kadda' ri ñam na gaañcaha.* »✧ Bíníyúté biti bal : « *Bëyí légéy wadtee yínlú opa'i.* »✧

* **5:18 5.18** *Mbaam* : Lo' daa bíníyú di gerek, ndah bëewí yaaha húmú línúu a fana. ✧ **5:18 5.18** Saame Nérsí Kootaa 25.4 ✧ **5:18 5.18** Saame Lúkkë 10.7

¹⁹ Bëyí hëwrë' ow di njíttí janaa doo na, ngana gém woni, hém dí laheh seede ana mbée éeyë.

²⁰ Bëyí dékë' bakaad waa na raa nék, lah líkíné rí fíi bëewë bëéß nda wa fi bëewí yaa ßal neeh, ßanti paŋ bos.

²¹ Leegi, mee roo won ña ee di fíi Koope a Yéesú-Kiristaa a malaaka ya tansu ra bitih, fu ñee iña won mi ro yaa ra toŋ. Di filið yaaha bëéß nék, lah téydée bëewë bëéß tígë yínë, fu ßan waa génëntélë'.

²² Ngana gaawti tík ow ya' fu fal ri njíit janí toñeh dí paŋ yin níi fu none na bakaada. Lah hene bëyí lante ces !

²³ Ngana teyil han muluð kep, lah oope bëéñ yutuud ndah eeñi lowa na dékë' hamu ra.

²⁴ Lahte bëewí fí yúhté bití balaa wa tēekrú kēem sah deefa' bakaadfi wa olu ngēey, ndaa bëewë aana, yi wa yúhúu filoon fe.

²⁵ Ti ñaaha nen ßal, pagadfi wunte oluu oloo ngēey, te wuti lah yi teeluyti olu raa sah, wa mínéh dékë' ñapoh.

6

Di wadti man ñaam yíkíi në

¹ Bëewë henu ñaam ra warutee on kélfë yí wë cér níi mit sèk. Hen ñaa raa, ow ii won ßos sun fi Koope a sun fi iña na yēeddúu yen ña.

² Yee kélfë yí wë gémú Kiristaa na ra nék, ßanuy haba' bití wa koy-yaayyi wa filið ngémë rek, wa yap wa. Wa kay, wa warun ßaatti ñee woni wa waro, af bití wa fi kélfë yí yah wa bëewí

gémúté, Koope faha'te wa níi faha', te daa nay njiriñee légéyí wë.

Alal ma hom pokoh Koope na ra

Iña wad' fuu yëeddë' fu túuyë' wë rë, daa wa yah.

³ Lah bëyí yëeddë' yin kay, dī kaa' ñee unni kaaf ki Yéesú-Kiristaa Yíkíi yen a iña yëeddúu ñéerë'té a pokoh Koope na raa,

⁴ deef bëyí baa gaan-gaanloh gaan-gaanloo, te ri yéeh dara. Faha' taasa' a íñë' sun fi wonni lahay njiriñ kep daa afi. Yaa hom mada' jér nen dīi na te baa daa na kúd' iñaan, íñë', sola', níb bos sun ow,

⁵ a wonni mínéh dúm hanndal ki bëewí nuffi wa laday te yíh kaah. Bëyí baa homa' biti pokoh Koope na yin saamaa alal.

⁶ Nagajek, pokoh Koope na a doylloh yii laha' fu, alal ma hom na ra caakke.

⁷ Na ayu yen ëldúnë rë, yen kúrëelúuy dara te yen yahti saañ raa, yen ii kúrëelëh dara bal.

⁸ Kon, yen lah yii ñamun yen a yii bekuun yen raa, baa wadtee yen doy sëk.

⁹ Bëewë na fahuu alal caak ra hom keenuu fīirí Seytaane, nuf bos haal wa. Te faha' lah iñi lahay solo te wuneh waa na daa na bek wa na. Iñyaa daa na yah bëewë, daa na san̄ku wa bal

¹⁰ ndah gém hélíis púlë' bos kep a bosí mín dīi man bééß. Lahte bëewí fí yúhté biti tíkú hélíis kep affi wa níi wa súugúuté ngémí wë. Yii baa tahte faraah keeññi wa na nebeh te daa wa tíkú rí affi wa.

Líkíní Pool Timooté yii len̄ke ngém

¹¹ Kon, do fa bëyí Koope bee ra, lah hegee pagadɗi yah, fu yuloh saam yii júbpé, fu pokoh Koope na, fu lah ngém, fu faha' moroomu, fu mín múñ, fu sos.

¹² Lah beye wodu haa'a níi mit fu ham ngémú híin, fu haal pesa na dúméh dëek rë Koope ra. Dëekúu fú rë, fu seedete kaaf ka fii i ow caak.

¹³ Leegi, di fii Koope fa na ona' pes béeb dë a di fii Yéesú-Kiristaa fa húmú seede kaaf ka fii Poos Pilaat ra, mee roo won da ee :

¹⁴ lah ñee túuyë' yë, fu lan, fu laheh dara yii wonun sun fu níi nímílín kí Yéesú-Kiristaa Yíkíi yen

¹⁵ wahtaa faha' ri Koope ra.
 Di fi Koope fa baah teem dii na ra,
 di fa yínë kut daa luk doole ra,
 di fa daa Buuri buurra ra,
 di fa daa Yíkëe fë lukki gaan da,
¹⁶ di fa kut daa ii húl,
 dékké niiñi ow mínéh nëe leboh ra,
 di fa ow mësëy tík il rë,
 di fa ow mínéh rii tík il
 níi ñiin bëe' teyeh na ra,
 daa ri mit béyíd,
 daa ri yeeliyoh doole
 níi kiri fi kirih !
 Démíin !

Woni Pool yii lenke yíkëe yí alalla

¹⁷ Lah wone bëewë lahu alal feey fi bee ra biti wa banuy tík yaakaari wa alal mi yaaha, wa gaan-gaanlee. Yaa ay gété gété ! Wa tókún yaakaari wa Koope na, di fa na on yen níi mit sèk nda keeñni yen sos da.

¹⁸ Túuyé wë paŋ yin wun, alal mi wa hen pagadfi wunni wa, wa naa'-keen, wa on bëyi lahay.

¹⁹ Hen daa raa, wa ay gad alal mí wëerté, yi nay waa njiriñe fayu, wa haal pesi kah-kah fa.

²⁰ Cëy Timothe, lah habe iña dénénéú fú yaa ra híin ! Lah moytee wonna lahay njiriñ te won yii lenke iñi ëldúnë kep ra, wonni taasa' ya na wonuu mbata ham-ham te kaah neh ra.

²¹ Lahte bëewí pokuu mbata ham-hammaa ka wa yaa ní tahte wa wuluute ngémë.

Koope líhë rën mal !

Séréel Ndút: Unni Koope

Ndut: Séréel Ndút: Unni Koope (New Testament+)

copyright © 2020 Wycliffe Bible Translators, Inc.

Language: (Ndut)

Contributor: Wycliffe Bible Translators, Inc.

All rights reserved.

2025-05-16

PDF generated using Haiola and XeLaTeX on 16 May 2025 from source
files dated 16 May 2025

a3a1238b-9393-5875-a4c5-1d3f38537bfe